

3

SOMMAIRE  
DEFENCE DE ROC  
LE BAILLIF SIEVR DE  
LA RIVIERE CONSEILLER  
& Medecin ordinaire du Roy &  
de Monseigneur Duc de Mer-  
cœur, aux demandes des do-  
cteurs, & faculté de me-  
decine de Paris.



*Dente timetur aper, descendunt cornua ceruui:  
Imbelles damæ quid nisi præda sumuss*

A PARIS.

• 1 5 7 9. •

---







A NOSSEIGNEURS DE LA  
*Court de Parlement à paris Roch le*  
*Bailliffieur de la Riviere Medecin du*  
*Roy & de monseigneur Duc de Mer-*  
*cœur desire gloire & fælicité.*

**L**'Vn des premiers degrez de  
la toute puissance (Nossai-  
gneurs) est qu'entre tant  
d'hommes qui sont, ne s'en  
trouue deux qui ne different, nō seu-  
lement en face, geste, parole ou com-  
plection, mais en l'escriture mesme. Et  
ce que ie trouue encore plus admira-  
ble est que tous semblēt estre reduits,  
& se cognoistre sous l'vn de ces qua-  
tre poincts. Car les vns sont veuz res-  
sembler à dieu, le plaisir desquels n'est

qu'en la speculation des choses hautes & secretes, & actionner en vertu. Ceux cy sont appelez sages ou bons & sçauans, le naturel desquels est pouuoir profiter à tous. Autres estudient à leur propre perfection & sont dits prudets. Le plaisir desquels est au maniment de la chose publique & ciuile. Les tiers sont assimilez aux femmes desquels le plaisir & affection est la volupté. Les derniers sont veuz représenter la nature des bestes sauvages, parce que leur plaisir seulement est tōurmenter & voir souffrir les autres. Les premiers desquels sont ceux qui sont naiz philosophes, & de la medecins.

Il s'est meū de ce temps vn controuerse en la medecine par toute l'Europe, pour la cognoissance de la cause & cure des maladies. Les vns assignans cause (qui semble nouuelle) disent que

plusieurs meurent pour n'estre cognu  
le mal, les autres respondēt que le mal  
est assez cognu: mais qu'il en faut pas-  
ser par là. L'experience qui est la preu-  
ue de la science doit estre iuge entre  
eux. Aussi a elle enfanté grād nombre  
de doctes, en la reformation de la me-  
decine mise en ieu par le tres-docte  
Paracelse: Pour lequel auoir suiuy en  
ce que i'ay trouué bon, plusieurs criēt  
apres moy, & à ceste occasiō suis pour-  
suiuy par deuant vous (Messeigneurs)  
sous pretexte d'un priuilege afin d'e-  
stre empesché de tel exercice en ceste  
ville: en laquelle ie suis à la fuitte de  
mes affaires, par de grans parties accu-  
sé, & aux despens d'eux, & de la vie de  
quelques seruiteurs, iustificié. Mais puis  
qu'ainsi est, & afin de ne demeurer en-  
cheuestré des calomnies medicinales,  
Ie vous supply tres-humblemēt croire  
qu'il est tres-difficile, aux argumens si

cruds , faicts sur vne doctrine de tel poix, de contenter ceux qui en iugēt, que preallablement le subiect d'icelle ne soit entendu: Ce qui ne se peut sans premier en discourir : chose qui m'a esté impossible à cause des interruptions qui m'ont esté faictes . Occasion en partie que i'ay escrit ce petit traicté , qui pour moy parle à vostre autorité, pour luy faire cognoistre par l'experience, que la rethorique ny beau discours , encores moins les subtils argumens , ne font la verité de la chose, & ne guarissent les maladies, mais les remedes mesmes : ioint que vostre presence estonne les plus asseurez. Et pour n'estre veu tel , ne si ignorant , que deuant vous ie suis accusé: Vne chose ie requiers de vo<sup>r</sup>, qu'il me soit permis monstrier en public, ou par raison, ou effect, ou tous deux ensēble; que la Goutte , Hydropisie , Epilep-

fic, Paralifie, Phthifie, grauelle & fieb-  
ure quarte font curables, n'ayant que  
le mal à combatre. Combien que plu-  
sieurs en ceste ville & aux champs, le  
peuvent en eux tesmoigner. Je vous  
supply tres-humblement cependant  
prendre en bõne part, & croire que si  
n'estoit mon deuoir faire valoir pour  
le bien public ce que i'ay de don de  
Dieu, & pour me iustifier, & mon-  
strer qu'ainsi que la Loy n'est que rai-  
son escripte qu'aussi la Medecine n'est  
que la representation de l'experience.  
Je n'eusse entrepris la defence de ce-  
ste cause.

Je pry Dieu messeigneurs vous pre-  
seruer de la Iurisdiction medicinale  
de Paris ce quinziẽme Iuillet. 1579.

à iij

SVR LE CALOMNIEVX  
TRAITTE FAIT CONTRE  
le fleur de la Riuierc.

**C**E n'est pas d'aujourd'huy que l'aveugle ignorāce  
Combat obstinement les bons esprits de France:  
Ce n'est pas d'aujourd'huy que l'on voit des esprits  
Qui contre l'ignorance ont dressé leurs espris.

De tout ce que le ciel cerne, tourne & embrasse,  
De tout ce que contient & porte ceste masse,  
Et bref de l'univers l'effect plain de vertu  
Tousiours par l'ignorance a esté combattu.

Mais d'un diuin demon qui luy est aduersaire,  
A tousiours enfanté le remede contraire:  
Nous a ouuert l'esprit & d'un ray gracieux  
Chassé le faux nuan qui decenoit nos yeux

France tu le peus voir & si tu n'es bandée,  
Tu connois les erreurs ou l'on t'auoit guidée,  
Non pour te violer, non pour raurir encor  
De ton sein d'espouillé les richesses & l'or:  
Car cela seroit peu & ta force rauie  
Se pourroit reſtablir en conseruant ta vie.  
Mais pour te ruiner & par mille moyens  
Meurdir dedans ton flanc tes propres cytoyens,  
T'acabler tout a coup & sous vne nuee  
D'ignorance acabler la France d'esnuee



Ie ne t'en diray point la cause & la raison,  
Tu as dedans tes mains le vray contrepoison,  
Vses en si tu veux vers toy tu es coupable  
Si te pouuant aider tu te vens miserable.  
Le Dieu aux blons cheueux dont les yeux reluisans  
Changent, font & refont l'entresuite des ans:  
A peine n'aissoit il qu'un Pithon miserable  
Courrant sept lieues de terre & de meurtre effroyable  
S'ataqua contre luy, & toutesfois en fin  
Il surmonta sa force & en vint à la fin.

Qui estoit ce Pithon? Rien sinon l'ignorance:  
La terre qu'il couuroit n'estoit que l'abondance  
De ceux qui enyures d'ignorance & d'erreur  
Mesprisent la science & iugent par fureur.

Tels l'on voit auioird'huy, ceux la mon la Riuere  
Qui sans sçauoir pourquoy aboyent ta lumiere  
Sataquent contre toy & veulent bien semer  
Leurs cartels venimeux, sans oser se nommer.

Vrayment ils ont raison car si la medecine  
Est comme elle est aussi vne chose diuine  
Il faudroit corriger leur esprit esuenté  
Comme ayant attenté sur la diuinité,  
Sacrileges qu'ils sont qui osent entreprendre  
De parler d'un sçauoir qu'ils ne peuuent comprendre  
Qui est venu des Dieux & d'ont l'heureux effort  
Combat & la fortune & le temps & la mort.

Hippocrate ou es-tu si tes manes heureuses

Pouuoient, en rassemblant leurs reliques poudreuses,  
Voir encore les cieux, que diroient tes esprits  
Voyant en tant de pars dechirer tes escrits?

Auouerois tu bien ceux qui vuides de science  
Nient des corps d'en haut la celeste influence?

Ie suis certain que non : car tu connoissois bien  
Que sans les corps d'en haut ceux d'icy ne sont rien

Auouerois tu bien ceux dont l'ardeur trāsportée,  
Va deschirant tes os ainsi que d'un Panthée?

Auouerois tu bien ceux qui deffous vn faux nom  
Feignant t'entendre bien, corrompent ton renom?

Sors hors de ton tombeau, & vengeāt telle iniure  
Foudroye courageux leur parole pariure:

Ils offensent ton ombre & l'offençant ainsi,  
La santé & la vie est offensée aussi.

Heureux fils d'Apollon qui d'une main diuine  
Exercez saintement l'art de la medecine,

Ne pensés que pressé d'un violent courroux

Mes propos & mes vers s'adressent contre vous:

Ie ne veux estre tel & en ma conscience

I'adore constamment vous & vostre science.

Ie ne parle qu'à ceux qui sans dire leur nom,

Feignant fuiure vos pas, tachent vostre renom:

Qui ne sont rien que vent, & de vaines paroles

Emplissent le pourpris de vos doctes escoles.

C'est à vous à venger leur langue qui mesdit,

A tracer les propos qu'ils ont meschamment dit,

*A rompre leur bourgeon, qui sil prend accroissance  
Du tige naturel osterà la puissance.*

*Je croy vous le ferez, & vostre œil arresté  
Cognoistra à la fin quelle est la verité.*

*Reprends donc tes esprits, prends cœur mon la Riviere  
L'ignorance ne peut accabler ta lumiere*

*Ton nom viura tousiours, & ton docte sçauoir  
Malgré tous ces causeurs luisant se fera voir.*

*Ce n'est qu'un apprentif qui crie en ceste sorte,  
Mais toy en respondant par vne voix plus forte*

*Tu fais voir ton esprit, corrigeant doucement  
Par un docte traicté leur peu de iugement*

*Aumoins apprendront-ils qu'en vne bonne escole  
L'on combat de raison, & non pas de parole*

A MESSIEURS LES DOCTEURS  
DE LA FACULTE DE MEDICINE  
A paris. G. C. P.

D.

**V**ous voulez empescher la Riviere scauant,  
Et doctemedecin d'exercer sa science,  
Pource qu'il n'a pas pris le tiltre d'arrogance,  
Et que par tout, vostre art pas a pas n'est suiuant:  
Il a mis sa science & doctrine en avant  
Dont il offre monstrier l'art & l'experience  
Qui vous denst inciter à laisser l'apparence  
D'un tiltre qui souuent le monde est decepant:  
L'interest est public, Messieurs laissons enuie,  
Puisque vous nous laissez en nostre pleine vie  
Languir en tant de maux que ne pouuez guerir,  
Aumoins n'empeschez point celuy qui le peut faire  
Et si vous auez peur qu'il nous face mourir  
L'experience en luy monstiera le contraire.

A MONSIEUR DE LA RIVIERE  
I. B. P.

**T** fus assailly seul par une grosse bande  
D'hommes, scachans tresbien un discours arranger,  
Habitans de ce lieu, ou tu es estrange,  
Ou rien que ton scauoir n'as qui te recommande:  
Chascun d'eux s'employoit d'animosité grande  
A descrier ton art, s'efforçans te charger  
D'ignorance & d'abus: que pouuoit-on iuger?  
Sinon que du proces tost porterois l'amende?  
Mais ores qu'avec eux en balance estant mis,  
Leur Nombre, Antiquité, Bruit, Eloquence, Amis,  
Ne peuent emporter de toy seul la victoire,  
Le monde esmerueillé, (de ta science espris)  
Blasme tes enuieux, & supprime leur gloire  
Pour te donner en l'art d'Esculape le prix.



SOMMAIRE TRAICTE  
APOLOGIC SERVANT DE  
*deffence aux calomnies imposees à Roc  
le baillif Sieur de la Riviere Medecin du  
Roy Et de monseigneur Duc de Mer-  
cœur. Deduisant les Principes des choses  
Aucc quelques preceptes de medeci-  
ne, & la necessité de l'art signé en icelle  
qui est cognoistre la vertu de chasque cho-  
se par ses propres marques, avec exemple.*

**L**E proverbe commun veut,  
qu'il est dur se departir d'un  
viel usage & ne s'en trouue  
point qui pl<sup>r</sup> ait besoin de-  
stre soubstenu q<sup>u</sup> celuy auquel y a plus  
d'ab<sup>s</sup>, de peur que la cheute ne soit aussi  
lourde, que la supposition est grande.

La medecine est de la creatiō de Dieu  
authcur de verité, nō seulement pour  
curer vne maladie, mais toutes, proue-  
nantes de la deprauiation de l'vne des  
substances, qui constituent la matiere  
des corps. Et pour-ce a il dit. Honorez  
le medecin pour la necessité.

Eccles. 28

Afa & Ochosias pour l'auoir mise en  
mespris, en souffrirrent. Hyppocrate  
a dit de son tēps, icelle estre tellement  
brouillee par ceux qui l'exerçoiēt, quel-  
le estoit en mespris, tāt à cause de leur a-  
b<sup>9</sup>, que du peuple qui les estimoit me-  
decins. Et les dict sembler aux ioueurs  
de farces, qui par leurs gestes & habits  
representent celuy qui n'est point.

Reg. 2.  
ch. j.

Lib. de le-  
ge.

Et Galien de son temps les accompa-  
re aux volleurs, qui sçauent prendre la  
despouille des marchants, & entreux  
f'espargner: & ne differer qu'en ce que  
les vns exercent la pratique en la ville,  
& les autres aux montagnes.

Au mesmelieu il confesse, que aduenant quelcun plus sçauant qu'eux medecins, & qui sçait predire l'euuenement des maladies: comme spasmes, flux de sang, sueur, ou mort ou cōualecence, ou sçait curer les maladies que les autres ignorent: qu'ils sont incontinent appelez prestigiateurs.

Hypocrate confesse de soy, encor qu'il eust attaint la vieillesse, n'auoir at- In epist. ad democrit. taint la fin de la medecine. Puis qu'il confesse n'auoir eu la parfaicte con- gnoissance, de necessité il en reste à sçauoir. Asçauoir si celuy qui trouuera le reste sera blasmable? & si ceste noua- lité doit estre reiettee?

Galien ne fait difficulté se dōner gloi- 6. Meth. thod. re, auoir inuenté plusieurs medicamēts incognus, ny encor en l'vsage des hō- mes auant luy.

Il dit, les medecins ne deuoir disputer d'Appolo ny d'Æsculape, mais s'effor- 1. Meth. Med.

cer d'accroistre la medecine & de tout leur pouuoir la parfaire. De la se peut feurement recueillir, que la parfaissant, il faut trouuer ce qui est ignoré: & le trouuant ne peut qu'il ne soit appellé inuention, & partant nouuauté.

Lib. quod  
opt. me-  
dic. sit &  
phil.

Et comme raison ne se peut celer, icel-  
luy Galien vse de ces mots . Si nous  
estions vrayement amulateurs d'hy-  
pocrate & nous exercions en la ra-  
tiocination: Rien n'empesche que  
ne deuinsions non seulement sembla-  
bles à luy mais encores plus que luy  
Aprenans de luy ce qu'il a bien escrit  
& trouuant par nostre industrie ce  
qu'il a obmis.

Duquel est plus loisible tenir & ap-  
prouer l'inuention en la medecine,  
pour la cognoissance & cure des mala-  
dies ou de Galien, ou de Paracelse, ou  
d'un autre? Peut-il estre qu'il ny ayent  
rien ignoré? vraiment cela peut estre



en celuy qui ne sçait rien du tout.

Galien dit, Dioscoride & Artemido-  
re auoir changé & mué les vieilles le-  
çons d'Hyppocrate.

lib. de his  
que in  
med. fiūt.

Neantmoins Dioscoride est tenu  
& suiuy comme l'oracle des simpli-  
stes, & experimentateurs, qui ne peut  
auoir chagé le vouloir d'Hyppocrate,  
qu'il n'ait introduit vne noualité : la-  
quelle ce pendant est receue . Que se  
peut recueillir de là? sinon que l'inten-  
tion d'Hyppocrate est estourdie?

Vigo atteste de soy, auoir curé vne  
carriofité en Iule second pontife Ro-  
main, apres que tous les remedes qu'o  
auoit peu trouuer ny eurent serui, ains  
le mal croissant de iour en heure,  
au veu de tous, & sentimēt du malade.  
Dōt fut contraint cercher nouuelle fa-  
çō, nouuelle methode & raison, voire  
inufitee de curer, & dont iceluy Pōtife  
fut deliuré.

lib. 2.  
tract. cod.  
cap. 5.

Asçauoir fil n'eust eu recours à la noualité de remedes, & non escrits, fil eust curé ce mal, & l'ayant faict est il a reietter?

Lib. 5. ob-  
seruat.

Ce doct<sup>e</sup> Valeriola (apres Paracel- se toutesfois) dit estre de son temps venu en congnoissance, que leau de vie rectifiee est assuré remede aux vlceres les en lauante: ce qui est vray.

Lib. 4.  
enarrat.  
medici-  
nal.

Iceluy mesme se complaignant: de- mande. Ou est celuy qui a congnu la verole ou mal Neapolitain auoir affli- gé les hommes, au precedent quatre vings ans, & les diuers symptomes qui l'ont suiui? Et qui a au precedent ren- du raison ny trouué, que son remede fut au vif argent, & decoction du bois sainct, ou guaiac? Certainemēt (dit-il) plusieurs genres de remedes sont de nouueau ven<sup>9</sup> & de nostre aage en co- gnoissance, au grād biē & soulagemēt des hōmes, du tout ignorez aux anciēs.

Celuy qui a senty, & se voit deliuré de la goutte, par l'vsage du magistere des perles, & du corail, peut il pas de bõ cœur saluer celle nouualité?

Celuy qui fest veu deliuré de la grauelle dõt il estoit si malade, qu'il ne pouoit vriner, par l'vsage de l'huile de mastic & le ius de citrõ. Et autres de la pierre, par l'vsage de l'eau de cristal, ne sont ils pas tenus à ceste nouualité?

Ceux qui se voyent deliurez du mal françois, par l'vsage du magistere de la prime vere, & sãs garder la chãbre, doiuent ils crier vëgeance sur la nouveauté?

En mesme rang se peuuent trouuer ceux qui par l'vsage de la douceur du vitriol d'Hongrie, se trouuent gueris de ce cruel mal epilepsie.

Autant en puis dire voyre avec assurance, de l'hydropisie & paralyfie, icelles auoir leurs remedes certains, de la pluspart desquels pour l'inuention ie

en deuons l'hommage à Paracelse.

Celuy qui a veu les effaiets de la corne de cest animal que noz curieux voyageurs appellent Abada:confesse-ra qu'il n'y a plus de precieux secours contre les poysons, deffailances, languers, & la petite verolle au prix de ce remede. I'en ay escrit particuliere-ment; il s'en voyt vne entiere au com-pas d'or ruë S. Iacques chez le curieux Poret apoticaire.

Si cccy est à reietter, il faut en pareil cas, crier sur ceux qui ont apporté la pierre nephretique, qui tenue en la main, faict pisser la grauelle.

Je ne cotte point ces passages, par ce que l'experience les iustifie.

Brief ou la medecine est veritable, ou elle ne l'est point: si veritable, ses regles sont certaines. Or est il qu'elle est veritable, pour estre de la creation de Dieu, & que Dieu & la nature ne fōe

rien en vain, il sensuit dont qu'elle a  
preceptes veritables. Ce que Hyppo-  
crate a senti encor' qu'il fust ethnique, lib. de de-  
centio  
nat.  
en ce qu'il a dict le medecin philoso-  
phe estre semblable à Dieu, Or ne le  
peut il estre, qu'il ne suiue verité.

S'il me falloyt rapporter à ce subiect,  
tout ce que la nouveauté apporte a  
ceste science : il me conuiendroit ter-  
miner ma vie sur ce discours encor' n'é  
atteindrois-je la moindre partie. Cō-  
bien qu'il n'y ait riē de nouveau soubz  
le Ciel, attendu que tout y est, Ainsi  
qu'en toute pierre ou tronc de bois,  
sont tels portraictz & images qui se  
peuvent imaginer, ne reste seulement  
que à les elaborer.

Tellement que par necessité faut cō-  
fesser, qu'ignorance seule confesse la  
nouveauté. Et comme ignorance est  
mere d'admiration, aussi est nouveau-  
té, sepulchre d'ignorance.

Il la faut donc embrasser pour dire  
avec Platon, estre chose diuine ayder  
& secourir les mortels.

Helio-  
dore.

Ceste creature ne peut estre cogneue  
sans congnoistre son createur : Com-  
me a voulu saint Hierosme en ces  
mots. Sans la congnoissance du crea-  
teur, tout hōme est brute ou pecore.

## DES PRECEPTES DE LA MEDECINE.

**H**YPOCRATE a dit, que l'Ex-  
periēce & raison sont les deux  
Principes de la medecine.

Introd.

Galiē apres luy, dict y en auoyr trois  
asçauoir inuention, constitutiō, & in-  
terpretation.

Desquels le premier, a vn ancien  
commencement à sçauoir experience.

Le second subsiste d'experience, &  
raison.

Et le dernier est naturelle speculatio.

Theophraste Paracelse passant plus haut, dit vrayemēt la medecine auoir trois principes & trois colonnes, asçauoir.

Le Ciel & l'air avec leurs spheres tiē-  
nent vne moitié, non seulement du  
corps, mais des maladies. Et la terre  
& l'eau avec leurs spheres regnent au  
reste.

Cognoistre le Ciel & la Terre est <sup>2.</sup>  
auoir plaine science de toute la nature  
humaine.

Autant qu'il y a es choses naturel- <sup>3.</sup>  
les, d'ascendents & impressions : au-  
tant y a il en eux de corps, qu'il faut se-  
parer auāt que pouuoir auoir le reme-  
de, que les philosophes ont nommé  
arcane.

Sur le premier precepte, faut con-  
fesser que les corps inferieurs, sōt regis  
par les superieurs.

Lib. de  
dieb. dec.

Galien recherchant la cause des mutations qui se font aux maladies, dict, que la lune par son mouuement, conionction, quadrature, & oppositiō avec le soleil, faict & apporte, grandes mutatiōs en l'homme. Et qui celle en lieu de trine aspect bon, apporter bōnes mutations, & au contraire. Et non seulement Galien, mais premier & auant luy, Hyppocrate en vne infinité de lieux, veut que le medecin cōgnoisse le mouuemēt de l'air & du ciel, pour euitier aux perilleux accidents des maladies, & adioute: le medecin ignorant ces choses, estre semblable à l'aueugle qui cherche le chemin avec son bastō.

Lib. de vi-  
et. rat.  
De aer. ac  
loc. de car  
nib.

Hyp.  
Haly in  
prolog.

esse egrit.  
secundū  
lunam.

Ce cruel mal Epilepsie est appelle maladie lunaire, à cause qu'il accompagne infalliblement, ceux qui naissent durant la conionction de la lune & du soleil. Ceste force & influēce ignoree, a rendu le mal, incurable par la prati.



que cōmune. Il laisse Aristote, Ptolomee, Auicene, Rhases, Albumazar, Trismegiste, Siluius, Valeriola, Cardan, Fernel Andernac & le reste des autres, qui tous confessent & ont cogneu, les corps inferieurs estre regis par les superieurs, pour venir à l'elucidation de ce premier Precepte.

Il est certain que le corps constitué, est dominé par les quatre meres matricies ou elements, mais l'un plus & l'autre moins.

Le Ciel avec sa sphere, donne au corps le mouuement. Et l'air avec la sienne, distribue le sentiment qui fait vne moitié du corps.

La terre donne la matiere, & l'eau le nourrissemēt. Les particularitez de laquelle distribution, sont de longue deduction, & qui aussi sont employees autre part.

Et pour la distribution des maladies.

Le ciel y apporte par inflammation la peste, pleuresie, & les autres maladies contagieuses.

Et l'air de sa part les fieures.

L'eau y plante les maladies, qui promptement effacent le nourrissement & les sens cōme Apoplexie, Paralyfie, Epilepsie & leurs semblables.

Et la terre pour derniere, y seme tout le reste des maladies, ou se faict solution de continuité. C'est le sommaire de ce premier Precepte, duquel s'en engendrent cent autres, qui attendent lumiere pour le bien de tous.

Sur le second precepte, Qui veut que congnoistre le ciel & la terre, est auoir plainc sciēce de la nature humaine. Je dis qu'apres auoir cognu le premier en ses parties, il faut aussi congnoistre le mouuemēt du ciel & de l'air en l'hōme: & le siege des spherēs des corps superieurs en iceluy: comme ie l'ay cité

soubs l'vn de mes aphorismes. Et par le mouuement de l'artere, qui est la vraie, eclyptique du Zodiace en l'hóme, remarquer le corps vitié en luy, & sa cheute ou releuement. Grande partie duquel se represente en ce que nous appellons Crise, ou iugement: Qui est ceste mutation qu'on s'attend voir au quatriesme iour d'vne maladie, pour estre indicatif du septieme, & luy, de l'vnziesme, & ainsi d'ureste. Et ceste mutation par le ciel faicte en la terre, exactement cognue: le sage se y oppose: non autrement que ostant ou reparant la matiere de la terre, en laquelle le ciel agit, ou lors ne trouuant subiect, son action tourne en Ecclypse.

Cecy merite vn liure entier. Je suppose toutesfois qu'il est cõgnu de tous, mais ils n'en disent rien.

Neantmoins ie desire faire entendre la cheute d'innombrable multitu-

de d'hōmes venir pour ne ſçauoir que le nom ou mot de Crife ſeulement, & non la cauſe de l'effect.

Que pluſieurs dōc dreſſent les oreilles, & remarquēt la terre couurir leurs erreurs, voicy comment.

Il eſt certain que noz corps ſont meuz, & enflammez par les ſuperieurs & autrement ne ſouffriroient. Car en l'ordre de la diſtributiō, le corps lunai- re en ſa ſphere apporte la mutation de temps en tēps, qui ſe fait en tous corps ſans exception par les points du zodiac. Exemple.

Aduenant quelcun pris de mal critic la lune eſtant au premier point d'Aries, inſalliblement au quatrieſme iour ſuiuant, à compter de l'heure du mal elle ſe trouuera en point repugnāt en propriēté à celuy ou elle eſtoit au tēps de la venue du mal. Et lors ſe fait la crife par vomiffement, flux de ſang, de ven-

de ventre , ou sueur : & en ce iour est deffendu ne faire effort en la nature soit par seignee , médicament solutif ou sueur , de peur que la nature se voulant descharger par la sueur ne soit forcee par autre emunctoire. Et pour ceste raison l'euacuation s'exerce au troisieme , ou cinquiesme iour du commencement du mal . Nul ne peut nier qu'ainsi ne soit.

Mais voicy le mal que souuent aduient voire le plus qu'attendants la Crise au quatriesme iour à cause du mouuement susdit il aduient que la Lune auãce son cours & se trouue des le troisieme iour au point qui fait & cause la Crise. Et sans y prendregarde le medecin qui veut coter ses heures, se haste , & conte seulement le quatriesme iour, pour la Crise, & sans autre ceremonie, comme hardy , faict seigner ou purger & par ce moyen

enuoye le malade se chercher au liure de vie. Et ou la lune se rend vagante ou retrograde, elle n'est à ce point que iusques au cinquiesme iour, auquel en aduient autant. Voila pourquoy Hyppocrate veut, le Medecin n'auoir que peu de malades, & l'aguir avec eux: Aufquels, comme dit Paracelse, il est crée pere & non docteur. Cest, pour briefueté, ce qui est de ce second precepte: Lequel avec le premier emporte la cognoissance de ces deux colônes de medecine, asçauoir Philosophie & Astronomic: Aussi diuisé pour son intelligence en cent preceptions.

Reste le troisieme qui est. Autant qu'il y a aux choses naturelles dascendents & impressions, autant y a il de corps qu'il faut separer auât que pouoir auoir le remede.

Nul ne peut nier, que par les deux

premiers preceptes ne soit cognu, la Philosophie estre cognoissance des corps & spheres entieres, de la terre & l'eau, & de tout ce qu'ils produisent. Et aussi que rien ne croist en eux, qui n'y soit semé du ciel.

Ny qu'Astronomie ne soit, cognoistre les mouuements de l'air & du ciel, & tels qu'ils sont, les remarquer en l'homme, pour euiteraux perilleux accidets des maladies. Et qu'iceux quatre elemés, cōme l'esprit de la premiere matiere, ne facēt le grād monde, qui est la matrice du petit asçauoir l'homme. Ainsi faut de necessité en icelles quatre meres, rechercher les remedes aux maladies qui sont chascune de leur production, & s'appellēt elementaires: comme, l'Epilepsie est maladie venant de l'element de l'eau, il faut aussi en cest Element trouuer le remede, qui en pareil

s'appelle elementaire : comme au virriol dulcifié, en la verdeur de l'emerarde, & autres (que ie laisse pour n'auoir ce subiect entrepris ) & ainsi des trois autres.

Et neantmoins aux maladies venantes d'eux, & qui sont metalliques, le remede ne se trouue qu'en la nature des metaux.

Et premier que passer outre, ie demanderay s'il n'est pas vray, que nul ne peut donner que ce qu'il a. Le ciel comme continent est pere seminateur, & la terre mere, qui reçoit la semence : lesquels quatre ensemble, & diuisement produisent toutes choses avec toute qualité ; & à eux semblables. Exemple, la terre produit entre ses plâtes, de chaudes iusques au quatriesme degré, comme l'ail, la persicaire &c. & de froides iusques au mesme point, comme la Ciguë, le Pauot, & autres.



Et de ses animaux en froideur iusques au quart, comme la Salamandre le gliron & autres. Et de chauts comme l'Autruche &c. & entre ses oyseaux, en chaleur le coq, la caille, le passereau &c. & autres excédants en froideur comme l'oye &c.

L'eau en faiçt autant en ses poisons & pierreries.

L'air en fa mamne & autres. Et le Ciel en ses impressions & influxions.

Et en icelles produçtiōs sans exception, se trouue remedes aux maladies, qui ne se peut auoir, qu'en separant les substances diuiselement, qui autrement n'apportent que confusion: comme pour exēple, ce qui est en la plante de propriété laxatifue est la substance salee, laquelle se dissout en eau, lorsqu'elle est infusée ou bouillie, cōme est la nature de tous les selz. Car le sel des plâtes ne mon-

te iamais en les destillant : c'est pour-  
quoy il ne se trouue point d'eau di-  
stillee laxatiue : qui ne la veut com-  
poser.

Or est il impossible le separer,  
que ce ne soyt par le benefice du feu  
non plus que l'eau de la plante ou son  
huile . Et tant plus que les choses  
sont molles , tant plus aysees sont  
leurs substances , à separer : & aux  
plus dures est requis autre artifice  
& plus penible . Comme en la se-  
paration qui se fait par infusion ou  
ebullition, il faut ce faire par le feu,  
& en la separatiõ de l'huile des plan-  
tes, boys & semẽce, cela se faiet en di-  
ueres façons , & diuers vaisseaux , &  
par diuers degrez de feu: les mede-  
cins ordonnent l'or en fueille, le spo-  
dium ( qui est ce qui s'en volle cõme  
cendre aux fournaies ou se fond l'ai-  
rain, & ce que noz Quiproquotistes

prehnent pour yuoire ou quelque cōs  
bruslé), l'airain bruslé, la Ceruse, la  
thutie, le Tartre, l'eau de vie, l'huile  
d'œufs, l'huile sainct, le sel de vipere  
& assez d'autres qui ne se peuuēt auoir  
que par artifice de feu, ou il faut pour  
ce faire varieté de vaisseaux, instru-  
ments & conduitte pour les degrez  
de chaleur. Parce moyen nous som-  
mes appris separer toutes substances  
les vnes d'auec les autres, & sans le-  
quel moyen il est impossible auoir le  
remede desiré. Ceste science est ap-  
pellee Alchimie par Auicenne en son  
traité intitulé almahad, & de la diui-  
sion des sciences : bien prouuee par  
Arnoult de ville neufue qui atteste  
auoir par le moyen de l'essence d'or  
guery en trois iours Henry Duc de  
verōne malade de lepre. Et par le mes-  
me remede auoir deliuré de peste In-  
nocent Pape, autrement incurable.

De ce temps par laduis de plusieurs doctes, Nous appellons ceste science Spageirie du mot Spao, qui signifie separer ou tirer & de ageirin, assemblée. Le docte Andernac premier de ce temps, extraict ses remedes excellēts par ceste voye. Veckerus en son antidotaire si heurensemēt receu en faiēt de mesme. Je ne diray point de Rhasis, Haly, Dioscoride, Valescus, de Tharāta, Petrus Aponensis, Fernel, Abuhali, Adā Abodēsteim, & de plusieurs autres medecins: ny des Philosophes cōme Trismegeste, Geber Abenhaen, Aristote, Alexādre Roy de Macedoine, Suidas, Raimond Lulle, Pline, Roger Bacco, Io. Picus Mirandula, Dastinus, qu'ils ont sceu & prisē ceste science, & que par elle l'ombre de leurs noms nous fait rougir d'honte.

Qui tous ont recogneu impossible separer ceste sciēce du corps de la me-

decine qui autrement demeure man-  
que: C'est à proprement parler celle  
des apoticairees appellee pharmacie  
c'est adire venenosité, cōme qui vou-  
droit dire, corriger la malice du medi-  
cament.

Pour cest article ie laisse à tous à pē-  
ser sil est possible desmembrer ceste  
science du corps de la medecine, at-  
tendu que l'exercice des deux premie-  
res asçauoir Philosophie & Astrono-  
mie, n'est que cognoissance qui nap-  
paroist sur sa forme qu'en langage, &  
& ceste cy est l'operation.

Pour fin de ce chapirte: messieurs  
de la faculté ordonnent sans cesse les  
essences des plantes tirees selon cest  
art qu'ils peuuent trouuer.

# SOMMAIRE DES PRIN- CIPES DE LA CHOSE.

**L**A premiere & plus admirable puissance du Dieu eternal est pouuoir tout, & tout creer de rien. Ayant en soy l'esprit de la premiere matiere, il se diuisa en quatre auxquels fut donné produire chascue chose avec toute qualité, & semblable a eux: & pour ceste occasion ont ils esté appelez Matrices, Meres, & Elements. Matrices pour ce qu'ils sement & conçoient: Meres, parce qu'ils donnent le suc ou le laiët. Elements parce que de peu ils produisent la matiere de tous corps, & sont eux mesmes sepulchres de leurs productions, qui sont corps constituez de matiere, en laquelle iceux Elemēts agissent par qualitez, donnans aux vns chaleur suiuiue de

siccité, & aux autres froideur inseparable d'humidité. En icelle matiere ne se trouue que trois seules substances qui la constituent: l'une desquelles donne le nourrissement, autre accroissement, & la tierce cōgelle & retient le tout ensemble. Celle qui donne le nourrissement est l'humide, & celle qui preste, l'accroissement est la graisse soufre huile ou raisine: & ce qui faict la congellation est la substāce sallee. La separation desquelles se faict en ceste sorte.

La partie en la matiere qui se peut enflammer, est ce qui se peut brusler, mais separé, est huile, soufre, graisse, ou raisine: & outre cela rien ne s'enflame.

Et ce qui s'exhale cōme en fumee est eau, ou humide.

Et lesquelles deux separees reste les cendres ou chaux qui est le sel

cōme il se voit que de toute chose se peut faire cendre, & de toute cendre, lessiue, & de toute lessiue sel qui est la partie coagulant avec soy les deux autres pour constituer la matiere, laquelle autrement est tartre.

Lib. de  
vet. med.

Lib. de  
genit.

Cest ce qui par Hyppocrate a esté appellée en l'homme amer, doux, & salé, ou acide salé & humide. L'un desquels a scauoir l'humide comme pl<sup>r</sup> apparēt; il a diuisé en quatre parties, qu'il appelle sang, bile, eau & melancholie: qui n'est que la tierce partie de ce qui constitue la matiere, & qui aussi dōne a cognoistre les maladies venantes de la deprauation. Mais les deux autres teues ou delaissees ont faict enseuelir la cognoissance des maladies qui sont de leur essence: occasion qu'elles sont tenues pour incurables si elles ne se terminent par nature. Ces trois substances



sont demonstratifs, & par consequent se peuuent Anatomiser : mais les quatre humeurs non.

Cecy a fait dire à ce docteur Fernel Lib. 4. de feb. ca. 9. les fiebres se curer plus souuent par nature que par les remedes, parce que la cause en est ignoree.

Et par n'auoir constitué la matiere des corps que de l'une de ses substances, & auoir ou negligé, ignoré, ou mesprisé les deux autres, & aussi que rien n'est qui n'ait cause, est demeuré liberté à chascun fouiller imaginatiuement parmy les corps pour les trouuer. Ce qui s'apperçoit euidentement en ce que, consultant une maladie à cinq ou six medecins, chascun en son estude se promet sçauoir la cause qu'ils diront diuersement, & ordonneront aussi chascun selon sa conception: mesmes estant ensemble ne s'accordent pas. Argu-

Fernel. li.  
2. de sim-  
pt. cap. 8.

mēt suffisēt pour prouuer le deffaut,  
car ou la chose est, ou elle n'est pas.  
Delà voit on la medecine ( qui a re-  
gles, causes de maladies, & remedes  
certains ) estre tombee si miserable  
que d'auoir esté par ses mesmes sup-  
posts appellee opinable (ou subiecte  
à opinion) & coniecturalle, & la ve-  
rité d'icelle n'apparoistre que par  
subtils arguments. Et aussi qu'elle est  
incertaine.

Hyppocrate de son temps a bien  
sçeu dire que par probables & sub-  
tilles fictions en medecine bien  
souuent sen ensuiuent de grandes &  
lourdes chutes. Delà est venu cest  
aphorisme *vult decipi mundus, deci-  
piatur.*

1. Meth.  
medend.

Aussi a voulu Gal. qu'on ne dispu-  
tast ny d'Appollo ny esculape, mais  
qu'on s'efforçast accroistre la doctrine.

Lib. præ-  
cept.

Iceuy Gal. reprend Hyppocrate

d'auoir dit la medecine cōiecturale.  
& que tant sen faut qu'elle soit telle  
ny opinable, que au contraire ell  
est scientifique.

Com. 1.  
aph.  
2. de cōp.  
me. se-  
cund lo-  
ca.

Et parce que i'ay deduiet autre part  
les causes du nourrissement en l'or-  
dre des digestions, des principes de  
tous corps, des maladies en la depra-  
uation des trois substances en gene-  
ral & particulier, les remedes ou ele-  
mentaires, ou metalliques, qui avec  
ce que dessus monstre au doit & a  
suffire la medecine estre demonstra-  
tiue & non coniecturale ie n'allon-  
geray ce chapitre: seulement diray  
qu'auoir pensé la medecine conie-  
cturale a rendu tout le monde me-  
decin.

QVE C'EST QV'ART SI-  
GNE, ET DE LA NECESSITE  
DE LA COGNOISSANCE  
en la medecine.

**L'**Arc du ciel appellé Iris pour sa varieté de couleur fut donné à Noé pour signe que le deluge estoit passé, & que les siecles ne finiroient plus par luy, mais par sa variâte couleur qu'il finiroit par feu. Il n'auoit apparu au precedent, & cependant sa presence nous est coustumiere.

Le ciel en son entier monstre sur sa brune ce qu'il veut apporter le iour suiuant,

La lune apparoiſſant palle au soir, monstre la pluye au lendemain, se montrant blanche annonce serénité.

Et rouge presage les vêts prochains.

La ſc-

La semence des maladies en l'homme luy faict sentir la mutation des temps.

Les seditions, guerres mutations de regnes, & autres telles choses qui ne portent signe que par leur presence, sont annōcees par cometes & autres signes, pour signe de la volonté de Souuerain.

L'usage a mis en prouerbe commun qu'il se faut garder de l'homme marqué ou signé.

Il est certain que les hommes tenants de l'element du ciel sont cognus par la volupté.

Les Aeriens par multiplicité de langage.

Les Terrestres par abondance de ris ou rīsee.

Et les aquatiques par le plaisir qu'ils prennent aux eaux.

Toutes sortes d'animaux se font

cognoistre ou doux , ou furieux , ou hardis ou timides, ou diligents ou paresseux, ou humains ou au contraire.

L'animal qui a la bouche grande, les dents aigues, l'oreille petite est signe de nature cruelle.

Celuy qui a l'oreille grande & le ventre mol porte signe de timidité.

Entre les oyseaux ceux qui sont au bec crochu est signe certain de rapacité.

Signe certain de sterilité en l'homme est n'auoir point de barbe & la voix deliée.

Signe de corruptiō de sang est auoir le nez de couleur violette.

La leure de dessoubs fendue, montre siccité de foye & serosité au sang: & les dents menues & clair plantees sont signe de briefue vie.

Les quatre lignes principales en la main, sçauoir du cœur, du cerueau des

reins, & de la ratelle, longues & non rompues sont signe certain de santé & longue vie, & au contraire,

Ceux auxquels le poil blanchist avant le temps est tesmoin assuré de quelque indisposition de cerueau.

Ce sont exemples que j'ay par brieveté representez pour tesmoin familier qu'il n'y a rien sans signes demonstratifs de la propriété du subiect. Et tels qu'ils sont aux hommes, non seulement aux maladies, mais aux complexions, ainsi sont ils aux animaux metaux<sup>1</sup> pierres & tous vegetaux. Sy que le bon Physiognome sçait représenter les vertus de chasque chose soit pour le bien ou le mal de l'homme.

Et afin que celuy qui ne se veut contenter de raison prenne l'experience en payemēt, faisons inuentaire de l'une des plantes qui nous est depuis peu de temps familiere, & les vertus de la-

quelle avec son nom sont encor en-  
feuelies avec beaucoup d'autres. Cõ-  
bié que à cause de la forme de sa fleur,  
& qu'elle semble fincliner a la pre-  
miere quarte du ciel, qui est depuis  
l'Orient iusques au Midy, elle ait esté  
appelée herbe du soleil.

Ceste premiere apprehension ( peut  
estre de l'odeur seulemēt de la doctri-  
ne) qui a faict appeller en nostre Fran-  
ce ceste plāte herbe du soleil, est vray-  
mēt sentir sa matrice: en ce qu'elle sem-  
ble comme dit est regarder à suiure le  
soleil leuant iusques à Midy. Et est  
chose belle, qu'elle se retrouue le len-  
demain au matin regardant le soleil  
leuant. Sa fleur represente vne ron-  
deur concaue de variante couleur, &  
sur les bords garnie de pappillottes  
en couleur iaulne doré: en sa forme re-  
presentant la figure du soleil, qui l'a  
faict iuger luy appartenir, & quelle est



du premier rang des plâtes a luy foub-  
mises, & a la premiere face de Aries  
maison du soleil, & dominee par l'ele-  
mēt de l'air. La diuision septenaire qui  
est en elle, & son Eccliptique demō-  
stratifs des parties de la sphere & re-  
gion du soleil en l'homme, sont les  
signes certains qu'elle est pour secours  
aux cardiaques passions, palpitation  
ou battement de cœur, preservation  
de ses parties représentées en elle. Son  
sel est remede certain a l'infection du  
visage qui prouient de l'impurité du  
sang arteriel, son eau à la serosité d'i-  
celuy, & son huile a l'Analepsie se-  
conde espeece de Epilepsie (combien  
qu'il soit de l'elemēt de l'eau) voire elle  
pallie la lepre si qu'elle n'apparoistra.

Ce sont partie des effaiēts des trois,  
substances de ceste plante, que ie pre-  
sente pour exemple aux desireux de  
doctrine, le plaisir est en voir la forme.

Ce rapport ainsi faict des parties de  
ceste creature solaire aux parties solai-  
res de l'homme s'appelle Anatomie  
ou diuision essentielle, qui se faict de  
tous les vegetaux sans exception par-  
ce mesme ordre. Et ce qui m'empesche  
de la particulariser d'auantage tant en  
sa racine, tronc, branches, mouelle,  
fucilles, fleur, que semence, est que i'en  
escri liure entier Dieu le voulant où il  
sera employé en tant que doit pour  
l'intelligence de ceste doctrine, & suf-  
fira en prédre vn exemple pour le pre-  
sent, afin que chascun cognoisse que  
c'est la science par laquelle nous con-  
gnoissons la vertu des choses: & sans  
laquelle il est impossible rēdre raison  
de l'effaict d'un remede. Car c'est vn  
methode assuré comme il faut co-  
gnoistre les plātes & toute autre cho-  
se, qui autrement nous seruent com-  
me le iour aux aucugles. Aussi tout ce

qui se fait en la medecine hors ceste science est Empirie.

La preuue de ce que dessus est l'experience.

N'ayons donc point de honte puiser en ce vaisseau de raison qui n'est nouveau qu'aux apprenants . Et que (pour le moins) la France remporte l'honneur auoir produict l'un des premiers restaurateurs d'icelle doctrine fille de la diuinité. Que si ce subiect requeroit d'auantage, ie l'amplifierois, mais le langage qui n'instruit n'est que vent.

c iiij



# RESPONCE AVX ALLE-

*gations, ( & non aux iniures ) portees en vn certain escrit sans nom adressé contre moy à Messieurs de la Court.*

**L**a esté traicte par vn iniurieux couard certain libelle cōtre moy: Pour auquel respondre ( laissant les inuectiues ) ie diray, qu'en la premiere page il m'appelle Empirique. Il ne luy souuenoit point que Hyppocrate veut la pratique de la medecine preceder la theorique.

Lib. præ-  
cognit.  
Fol. 1.  
Li. de hu-  
mor.  
com. 1.

Gal. dit Hyppocrate sembler auoir cognu plusieurs choses plus par experience que par raison.

Lib. de ar-  
ticullas. 7.

Et en vn autre lieu il dit que l'expérimentateur estoit celuy qui le plus estoit versé en la medecine, & qui n'exploioit son esprit autre part. Aussi que Hyppocrate estoit appellé expérimentateur.

Ie quitte ceste responce pour satisfaire a ce qu'il a allegué page 2. Auoir „ appris de Erasme beaucoup de choses „ contre Paracelse, mesmes de superstitieuses demesurément. Et diray seulement, que iceluy Erasme est prouué ennemi de la discipline ecclesiastique, & aussi sçait on sa reputation & origine que ie laisse, & pour se rendre iuge compétent des œuvres de Paracelse, il a dit a la fin de ses inuectiues, que ores que Paracelse dist verité, si ne le voudroit il coire.

Il s'attache a ce que i'ay dit, Les maladies se curer par leurs semblables.

Hippocrate Empereur en la medecine, suiui par Gal. Roy en icelle, & Auicenne comme Prince, a dit Les maladies estre causées ou faictes par leurs semblables, & guaries par leurs semblables mesme, y subioignant plusieurs exemples.

Li. de loc.  
in homi.

En la 4. page il l'escric sur ce que i'ay  
dit ainsi cōme l'or est repurgé par l'an-  
timoyne que nōstre corps le peut estre  
aussi, & dit que ce sōt venims & les me-  
taux aussi. Qu'il se souuienne Diosco-  
ride auoir dit estre aux asthmatiques  
vne bonne purgation faicte de l'Anti-  
moine, rougi (qu'il appelle stibium)  
auec sel, selon la dose qu'il escrit & re-  
duitte en pillules. Il est escrit aux Pan-  
dectes la propriété de l'antimoine profi-  
ter à l'Epilesie, & aux grosses humeurs.

Et apres dit que les vieillards qui en  
vsent ont la vie saine pource qu'il con-  
forte les nerfs.

Valefcus de taranta autrement Phi-  
lonium, dit la pouldre de oppopyre,  
de castoreum, & antimoine pris, curer  
l'Epilesie.

Petrus Bayrius (*veni mecu* des mede-  
cins) dit l'antimoine pris avec le casto-  
reum en vne oublie trempée au vin

lib. 4. cap.  
136.

Serap.  
auct. Gal.  
523.

lib. 1. cap.  
18.

lib. 2. c. 16.

estre remede au mal caduc.

Je pense auoir satisfait cy deuãt à ce qu'il a dit l'Alchimie n'estre de la medecine: parce ie m'arresteray luy prouuer de l'auctorité de Hortmanus medecin, que Galiē auoit ceste science, & se y delectoit grandement.

lib. hyft.  
temp.  
1494.

Symphorianus Campegius le testifie en son liure de la vie de Galiē & pourtant ie me passe du plus.

Il a dit en ii. page de l'auctorité des docteurs medecins, les metaux ne s'administrer iamais en l'interieur, & qu'ils sont pernicioeux.

Il ne luy souuenoit pas qu'Hyp. cõseille l'vsage de la rouillure avec miel.

N'y que Dioscoride eust conseillé boire du verd de gris qui est la rouille d'airain) avec Hydromel.

De morb.  
mulieb.  
pag. 242.  
lib. 5. cap.

Et en autre lieu assseurer que la fleur d'airain au pois de quatre oboles, beu purge les quatre humeurs.

4 2  
lib. eod.  
cap. 43.

Il a oublié qu'il Dioscoride dit de la rouille de fer rougie ( que nous appellons saffren de fer ) beu, auoir tant de vertus comme il escrit , & mesme faire engraisser les hommes maigres.

N'est-il pas connu que les medecins ordonnent ordinairement, les compositions qu'ils appellent condits cordiaux, estre couuerts d'or en fucille, & dorer aussi les pillules ? Brief il me cõmendroit vn liure entier qui voudroit recueillir ce qui en est escrit le par college mesme de la faculté, que ie reuere & honore.

Et pour tout le reste de son discours plus calomnieux que autrement , Je luy laisse a iuger si Gal. a mal dit l'experiance & raison estre les instrumẽts de l'inuentiõ, & qui sont iuges de tout ce qui se peut dire & discourir en la medecine.

Combien que ie ne puis passer sous



silence ce qu'il a dit, que si ie pouuois  
dissouldre vne miette d'or &c. qu'il  
passeroit condánation. Sil auoit vou-  
lu confesser que le veau d'or fut ietté  
en pouldre dans le iourdain, & faict  
boire aux enfans Disraël, il ne seroit  
(peut estre) pas si lóguemét en fiebure.  
Ou bien s'il auoit veu que par l'odeur  
du plób fondu, on peut mettre en vn  
moment l'or en pouldre voire impal-  
pable, ou bien avec le sel dulcifié de la  
rane, ou bien avec la seconde teste de  
l'Hydre des anciens, qui ne le permet  
iamais se rassembler. Je ne fay difficul-  
té d'ainsi parler sçachant bien que ce-  
ste responce luy est vne leçon. Tou-  
tesfois ie m'esbats d'ainsi parler, veu  
qu'il n'est croyable, estre sorti d'un do-  
cteur telles affirmatiōs: ains croy estre  
de quelque escollier intrát, qui a vou-  
lu mettre le feu au tēple de Diane: at-  
tendu l'affirmation qu'il faict a tous,

lib. de de-  
cent. or-  
nat.

que ie n'ay leu Hypp. ny Gal. ou bié il  
faut qu'il ne les ait iamais fucilletez,  
veu que le cōtraire de son allegué, ap-  
paroist en leur auctorité. Et ne s'est ap-  
perçeu du vouloir d'Hyp. que l'opiniõ  
en la medecine se termine en crime.

lib. de loc.  
aff.

Il se plaint que i'ay vsé en mes apho-  
rif. & ailleurs de mots qui ne furēt onc  
entédus en langue qui se cognoisse. Je  
l'ay faict pour son grād bié, s'il y veut  
pēser, attendu que c'est ce que i'ay peu  
descouurir du vouloir de Paracelse, qui  
s'y est serui à la mesme façõ q̃ dit Gal.  
d'Archigene, duquel il se plaignoit en  
auoir mis plusieurs en vsage, desq̃ls ice  
luy Gal. n'auoit peu trouuer la significa-  
tiõ, cōfessāt bié toutes fois chascune do-  
ctrine desirer ses propres mots. Et qui  
est bien plus, dit estre licite pouuoir  
muer & changer les nōs, pour veu que  
la chose demeure. Et dit encor' pl' ou-  
tre, que le mieux & plus souuēt les nōs  
des choses sont cōfondus entre les me-

li. de diff.  
sympt.

li. de diff.  
feb.

decins. Cest autheur sans nō se deuoit  
contéter de celà, & de prédre en paye-  
mēt vn eternal abus qui se cōmet sous  
ce mot Hirc<sup>9</sup>, qui signifie bouc en no-  
stre lāgue, le sang duquel ils tiēnēt rō-  
pre la pierre aux reins, sans s'estre aper-  
çeus q̄ le seul mot les a trōpez, attendu  
qu'ils deuoient prédre le sang d'un petit  
conil (qui se nourrist, so<sup>9</sup> les coffres) ap-  
pellez d'Inde & qui se véd en la Court  
du Palais nōmé Yrcus fāsh. le sang du-  
quel fait ce q̄ ils ont cherché au bouc, le  
quel par sa seule puāteur fait mourir:  
vraymēt ou ils ont tort, ou ie me trōpe.

Ie ne voudrois pour riē accorder avec  
Gal. qui dit le vulgaire des medecins à  
la semblāce des tyrās cōmāder aux hō-  
mes. Ny encor' mois de ce qu'il dit, que  
les medecins qui sōt dialecticiēs, Rhe-  
toriciēs, & grāmairiēs seulement & le  
plus, representent l'asne qui se veut es-  
iouir de la lire. Mais ie diray avec Hyp.  
qui (apres auoir fait lōgs discours sur la

2. met  
med.  
I. Dec  
cret. di  
claf. 4

lib. de  
aquis  
loc. fo  
III.

difference des regions , & la grande difficulté qu'il y a pour en auoir con-  
gnoissance ) dit l'Asie differer beau-  
coup de l'Europe, & elle de l'Afrique  
en la nature de tout ce que produit la  
terre, mais principalement des hom-  
mes. De la sensuit vne chascune regio  
deuoir auoir son propre medecin,  
vrayment nay pour sa patrie: aux ha-  
bitants de laquelle le plus souuēt l'ad-  
uis de l'estranger apporte confusion.  
Cecy a fait que la Grece a eu ses mede-  
cins grecs, l'Arabie les siēs, & ainsi des  
autres: & qui tous ont escrit en leurs  
lringues.

I'ay protesté a Dieu (duquel ie tiens  
ame, sens, vie, & cognoissance) & a sa  
iustice, que ie suis medecin françois,  
plain de bon vouloir de faire reluire  
la medecine à mon pouuoir, non pas  
pour la Frâce seulemēt, mais tant que  
l'estranger en mandie du François,  
com-

comme le François a de coustume faire de la langue estrangere.

Et pour cōclurre, puis que la fin de la medecine est guerir, & que pour ce est le medecin vne petite nature, comme l'homme petit monde, & la guerison, experiēce, qui ne se cognoist que par l'effaiēt, venons hardiment aux mains. Car la goutte, qui ne peut estre que de deux causes l'une, ou de cōgelation dissoulte, ou de dissolution congelée, se peut guerir.

L'epilepsie qui est vne deprauation de la substance humide subtiliēe, se peut curer par incrassant. Et aussi des autres qui meritent vn liure entier.

Protestāt derechef, qu'il ne m'entraonc en la volonte m'ellongner de la societe scholastique, encor' moins y apporter tumulte ou confusion, mais bien esclaircir à mon pouuoir la grandeur & certitude de la medecine: & a

ceste fin auoir recherché les secrets de nature, & en iceux trouué remediabiles les maladies qui par leur denomination seulement, se disent incurables: ou en grád nombre Dieu a beni mon labeur: ie le pry continuer ceste benediction & sur les malades & sur moy.

Il ne ma esté possible retenir sans dire , qu'entre les sens de l'homme la vuë comme premier , & plus pretieux est colloque au plus haut, ayant disposé son subiect capable de toutes couleurs , & comme n'en ayant point, afin qu'il puisse de toutes indifferemment iuger. Ainsi doit estre le iugement de l'homme , pour faire que l'abus authorisé ne putresc le siecle.

F I N.